

STATUTS

DA L'UNIUN

GRdigital

Per facilitar la legibladad da quests statuts vegni desisti da duvrar a medem temp las furmas linguisticas masculinas e femininas. Tuttina valan tut las designaziuns da personas per omaduas schlattainas. Sut «en scrit» vegnan chapidas inoltraziuns per posta u per e-mail.

Art. 1 Num e sedia

Sut il num GRdigital exista in'uniun d'utilitad publica en il senn dals artitgels 60 ss. CCS che ha sia sedia a Cuir. L'uniun è politicamain e confessiunalmain independenta.

Art. 2 Intent

L'uniun ha l'intent da promover la transfurmaziun digitala en il chantun Grischun per che la cumpetitivitad, la valorisaziun e la forza innovativa dal Grischun sco lieu economic possa vegnir augmentada sco er ch'il Grischun sco lieu d'abitar ed economic possa vegnir rendì pli attractiv. En quest connex duain er vegnir sustegnids ils svilups socials che resultan tras quai.

Tar tut quai ademplescha ella las incumbensas en connex cun la Lescha davart la promoziun da la transfurmaziun digitala che vegnan surdadas ad ella dal chantun Grischun tras ina incarica da prestaziun.

Ultra da quai po l'uniun:

- iniziar, accompagnar, coordinar u realisar senza projects;
- promover – sco post da contact e da coordinaziun interdisciplinar – l'entretschament a la transfurmaziun digitala ed a la digitalisaziun;
- sviluppar ed intermediar savida sco er cumpetenzas davart la transfurmaziun digitala e davart la promoziun da la transfurmaziun digitala;
- interprender tut las activitads e concluder tut ils acts giuridics ch'èn adattads per promover l'intent da l'uniun e che stattan en in connex direct u indirect cun quest intent.

Art. 3 Commembers

Commembras da l'uniun pon daventar persunas giuridicas dal dretg privat e dal dretg public u er persunas natiralas che vulan s'engaschar en l'interess da l'intent da l'uniun.

Tut ils commembers han il dretg da votar sco er il dretg d'eleger activ e passiv. Els han il dretg da far propostas per tut las fatschentas da l'uniun.

Art. 4 Commembranza

L'admissiun sco commember succeda tras conclus da la suprastanza sin in'annunzia inoltrada en scrit. La suprastanza po refusar dumondas d'admissiun cun ina curta motivaziun. Cunter la decisiun po la persuna pertutgada far protesta entaifer 30 dis tar la radunanza generala.

La commemoranza scada:

- en cas da persunas giuridicas cun la sortida, cun l'exclusiun u cun la schliaziun da la persuna giuridica;
- en cas da persunas natiralas cun la sortida, cun l'exclusiun u cun la mort.

Resguardond in termin da 6 mais èsi pussaivel da sortir da l'uniun per la fin da l'onn sin fundament d'ina decleraziun da sortida che vegn inoltrada en scrit a la suprastanza.

La suprastanza po excluder in commember da tut temp immediatamain da l'uniun, sch'el n'ademplescha betg sias obligaziuns, donnegescha la reputaziun u ils interess da l'uniun u na paja betg la contribuziun da commembranza malgrà in'admoniziun en scrit. Per excluder in commember activ è necessaria l'approvaziun da tut ils commembers da la suprastanza minus ina vusch. Cunter la decisiun po il commember pertutgà far protesta entaifer 30 dis tar la radunanza generala.

Art. 5 Organs

Ils organs da l'uniun èn:

- la radunanza generala;
- la suprastanza;
- il post da revisiun.

Art. 6 Radunanza generala

La radunanza generala è l'organ suprem da l'uniun.

6.1 Incumbensas e cumpetenzas da la radunanza generala

La radunanza generala ha las suandantas incumbensas e cumpetenzas:

- eleger ils commembers da la suprastanza ed il presidi;
- eleger il post da revisiun;
- collaudar il rapport annual ed il quint annual;
- prender enconuschientscha dal preventiv;
- fixar las contribuziuns da commembranza;
- concluder davart propostas che vegnan inoltradas da la suprastanza u dals commembers;
- tractar protestas tenor l'artitgel 4 dals statuts;
- midar ils statuts;
- fixar il reglament d'indemnisaziun tenor l'artitgel 7.5 dals statuts;
- fixar ils princips da good governance per l'uniun;

- distgargiar la suprastanza;
- schliar l'uniun u sia fusiun cun in'otra persuna giuridica.

6.2 *Radunanza generala ordinaria ed extraordinaria*

La radunanza generala ordinaria ha lieu ina giada per onn avant ils 30 da zercladur. La data vegn communitgada als commembers almain 60 dis avant la realisaziun. Propostas da commembers ston vegnir inoltradas en scrit a la suprastanza fin almain 30 dis avant la radunanza. La suprastanza envida ils commembers en scrit almain 20 dis avant la radunanza cun communitgar las tractandas.

Ina radunanza generala extraordinaria sto vegnir convocada entaifer in mais:

- tras conclus da la suprastanza;
- sin dumonda dal post da revisiun;
- sin dumonda d'in tschintgavel dals commembers activs.

Ina radunanza generala extraordinaria po ultra da quai vegnir salvada da tut temp en furma da la radunanza universalu senza observar las prescripziuns che ston vegnir observadas per convocar ina radunanza generala.

A la radunanza generala dastgan vegnir prendids mo conclus davart fatschentas annunziadas.

Nuncommembers interessads dastgan vegnir envidads da la suprastanza sco giasts da la radunanza generala.

Il presidi da la suprastanza maina la radunanza generala. La radunanza generala sto vegnir protocollada.

6.3 *Valur da la vusch, dretg da represchentanza e conclus*

Mintga commember activ ha ina vusch.

Persunas giuridicas vegnan represchentadas tras ina persuna ch'è autorisada da suttascriber suletta u tras ina persuna ch'è activa en la persuna giuridica e ch'è vegnida autorisada explicitamain. In commember da l'uniun dastga vegnir substituì d'in auter commember da l'uniun.

Conclus da la radunanza generala basegnan da princip ina maioritad simpla. Mo midadas dals statuts inclusiv midadas da l'intent da l'uniun basegnan ina maioritad da dus terzs; il conclus da schliaziun dovra ina maioritad da trais quarts.

En cas d'elecziuns è decisiva la maioritad absoluta en l'emprim scrutini, la maioritad relativa en il segund scrutini.

6.4 *Prender conclus e far elecziuns en scrit*

La suprastanza ha il dretg da prender conclus e da far elecziuns en scrit empè da salvar ina radunanza generala, premess che la suprastanza saja unanimamain d'accord cun quest proceder e premess che betg in tschintgavel dals commembers activs na pretendia ina tractativa a bucca. Las prescripziuns formalas fixadas qua survart en l'artitgel 6.2 valan analogamain.

6.5 *Render accessibels ils conclus*

Ils protocols cun ils conclus vegnan rendids accessibels u tramess als commembers da l'uniun.

Art. 7 Suprastanza

7.1 *Cumposiziun*

La suprastanza consista da tschintg fin nov persunas. I sto vegnir prendida en mira ina cumposiziun ch'è equilibrada en quai che riguarda l'intent da l'uniun. Abstrahà da l'elecziun dal presidi sa constituescha ella sezza.

La durada d'uffizi dals commembers da la suprastanza importa 2 onns. Admessa è ina reelecziun repetida. Il temp d'uffizi maximal importa 12 onns.

Sch'il dumber dals commembers da la suprastanza croda sut il minimum durant l'onn da gestiun, sto immediatamain vegnir instradada l'elecziun d'in nov commember da la suprastanza.

7.2 *Incumbensas da la suprastanza*

La suprastanza è l'organ strategic e tracta tut las fatschentas che n'èn betg attribuidas tenor lescha u tenor statuts ad in auter organ.

Ses champ da cumpetenzas cumpiglia en spezial:

- organisar la radunanza generala;
- fixar la planisaziun da l'onn ed in'eventuala planisaziun da plirs onns;
- deliberar ed ademplir las incaricas da prestaziun cun terzs, particularmain cun il chantun Grischun;
- liquidar incumbensas tenor las incaricas da prestaziun cun terzs;
- fixar ils reglaments;
- eleger e survegliar ils posts operativs (cussegl specialisà e secretariat);
- represchentar l'uniun vers anor;
- far il rapport annual ed il quint annual per mauns da la radunanza generala;
- approvar il preventiv;
- admetter ed excluder commembers.

7.3 *Prender conclus e valur da la vusch*

La suprastanza è abla da decider, sche dapli che la mesadad dals commembers da la suprastanza è preschenta.

Conclus ed elecziuns basegnan ina maioritad simpla da las vuschs. Mintga commember da la suprastanza ha ina vusch. En cas da paritad da las vuschs decida il presidi.

La suprastanza po prender conclus sin via circulara, nun che almain dus commembers da la suprastanza pretendian ina tractativa a bucca.

7.4 *Sesidas e delegaziuns*

Sesidas da la suprastanza han lieu tenor basegn, almain però duas giadas per onn. Ellas vegnan convocadas dal presidi 14 dis avant la sesida cun ina invitaziun che cuntegna las tractandas. Mintga commember da la suprastanza po pretender la convocaziun d'ina sesida entaifer 14 dis.

La suprastanza po consultar terzs per fatschentas che pertutgan ses champ da cumpetenzza.

La suprastanza po delegar singulas da sias incumbensas, sche quai è vegnì concludì uschia ordavant.

7.5 *Indemnisaziun per la lavur da suprastanza*

L'indemnisaziun per la lavur dals commembers da la suprastanza vegn reglada en in reglament d'indemnisaziun separà. L'indemnisaziun tegna quint da l'intent public da l'uniun e sto pervia da quai esser concepida en moda moderada.

Art. 8 Post da revisiun

La radunanza generala tscherna in post da revisiun per la durada da 3 onns. Admessa è ina reelecziun repetida. Las personas ch'èn activas en il post da revisiun na dastgan betg esser commembras da l'uniun.

Il post da revisiun controllescha il quint annual en il senn d'ina revisiun limitada e redigia in rapport e fa propostas a la suprastanza per mauns da la radunanza generala.

Art. 9 Posts operativs

L'uniun ha ils suandants posts operativs:

- il cussegl spezialisà;
- il secretariat.

Art. 10 Cussegl spezialisà

Per ademplir sias incumbensas po l'uniun nominar in cussegl spezialisà. En regard a l'intent da l'uniun sto quest cussegl spezialisà avair ina cumposiziun equilibrada. Il cussegl spezialisà suttastat a la direcziun ed a l'organisaziun da la suprastanza ed è competent per las dumondas specificas. Las incumbensas dal cussegl spezialisà èn:

- incumbensas tenor las cunvegns da prestaziun cun terzs, en spezial cun il chantun;
- cussegljar la suprastanza ed il secretariat en dumondas specificas;
- promover l'entretschament ed il barat specific tranter tut ils champs.

En cunvegnscha cun la suprastanza e cun il secretariat po il cussegl spezialisà installar gruppas da lavur u consultar spezialists dal fatg per sclerir dumondas spezialas u per accompagnar projects concrets.

L'indemnisaziun per la lavur dal cussegl spezialisà vegn fixada da la suprastanza en in reglament.

Art. 11 Secretariat

La suprastanza po surdar l'activitad operativa da l'uniun, cun excepziun da las incumbensas tenor l'artitgel 7.2, ad in secretariat elegì u nominà dad ella. Las incumbensas dal secretariat èn:

- gestiun operativa da l'uniun e sustegn da ses organs, en spezial tar l'adempliment da cunvegns da prestaziun e d'agens projects;

- accompagnament formal e cussegliaziun da projects;
- furniziun e coordinaziun da servetschs per commembers da l'uniun e per terzs;
- rapportaziun a la suprastanza;
- svilup ed intermediaziun d'enconuschientschas;
- realisaziun da la comunicaziun interna ed externa.

Art. 12 Incaricas da prestaziun da terzs

En il rom da ses intent ademplescha l'uniun incumbensas ch'èn vegnidas surdadas ad ella tras ina incarica da prestaziun. La suprastanza infurmescha ils commembers davart las incaricas da prestaziun e davart midadas essenzialas da talas.

Art. 13 Meds finansials

Ils meds finansials da l'uniun derivan tranter auter da las contribuziuns annualas dals commembers sco er da las indemnisaziuns da las incaricas da prestaziun, dals retgavs da servetschs sco er d'ulteriuras assegnaziuns.

Art. 14 Contribuziuns da commembranza

La radunanza generala fixescha l'autezza da las contribuziuns da commembranza annualas.

Art. 15 Responsabladad

Per las obligaziuns da l'uniun stat buna sulettamain la facultad da l'uniun. Mintga responsabladad persunala da ses commembers vegn esclusa explicitamain.

Art. 16 Good Governance

Cur ch'els adempleschan lur activitads per l'uniun s'obligheschan tut ils commembers da la suprastanza sco er dals posts operativs d'observar las prescripziuns da good governance che la radunanza generala ha definì.

Art. 17 Dretg da sutscriver

Il dretg da sutscriver per l'uniun han il president u in represchentant dal presidi ensemen cun in ulteriur commember da la suprastanza u cun il mainagestiun.

Art. 18 Onn da gestiun

L'onn da gestiun correspunda a l'onn chalendar.

Art. 19 Facultad da l'uniun

Commembers sortids u exclus da l'uniun n'han en lur funcziun sco commembers nagin dretg da la facultad da l'uniun. Contribuziuns da commembranza anc betg pajadas restan debitadas.

Art. 20 Schliaziun da l'uniun

Per schliar l'uniun dovri ina majoritad da trais quarts dals commembers ch'èn preschents a la radunanza generala. Il retgav da liquidaziun sto servir exclusivamain ad in intent sumegliant. Pervia da quai sto el vegnir assegnà ad ina instituziun ch'è deliberada da l'obligaziun da pagar taglia e che ha in intent public u d'utilitad publica. Il conclus en chausa vegn prendì da la radunanza generala.

La liquidaziun vegn realisada da la suprastanza, nun che la radunanza generala haja incumbensà liquidaturs spezials. Las cumpetenzas da la radunanza generala restan mantegnidas er durant la liquidaziun.

Sche l'uniun fusiunescha cun in'autra persuna giuridica u sche la radunanza generala concluda da schliar l'uniun, fixescha la radunanza generala sin proposta da la suprastanza ils detagls da las modalitads.

Art. 21 Protecziun da datas


L'uniun maina in register da ses commembers. Il secretariat sa stenta da l'actualisar permanentamain.


Entaifer l'uniun dastgan las datas dals commembers vegnir communitgadas als commembers. Las datas dals commembers dastgan vegnir communitgadas a terzs mo sin basa d'in conclus da la suprastanza e mo cun il consentiment dals commembers respectivs.

Art. 22 Entrada en vigur e valaivladad

Ils statuts èn vegnids approvads a chaschun da la radunanza constitutiva dals 10 da matg 2021.

Cuira, ils 10 da matg 2021


Jon Erni, president


Yvonne Brigger-Vogel, commembra da la suprastanza